

Г. К. Сазонов, А. М. Конькова

«Этпосыт холтӓл миннэ лӗҗх...» (потыр охса)

Туи рӗг порат, хунь хорамың лӗптат мӓг атаныл мӓ хосыт лӓкква тӓрамлӗгыт, Апрасинья Миронӗн пыг самын паттыс. Тӓнт тавӗныл, Картин мӓньлат пыгныл, мӓ яныт ӓлнэ мир халт, улпыл, сӓтыңнув хӓтпа ӓтим ӓлыс. Молях таквсы хӓталыт миначыт, вӓтасың тӗлы пора минач, нӗ титыт пыг самын паттыс, тувыл тав юи-пӓлӗт хӗрмит, нилыт... Тох Картиныт яныг колтӓгланыл иң нила вӓраяң хумыл сӓвнувӗг ӗмтыс.

Ӓгит ӓс ӓлсыт. Мирон ӓгиянӗн акваг сӓгтым ӓлыс, ты кос общинан тӓн я ос вӓр уртылыл ат майлӓлавет. Мирон ӓгиянӗн сӓгтыс, тӓн вильтаныл, хурияныл, хомус ӓгит ӗмыгтӗгыт, хомус потыртӗгыт, пуссын сӓняныл нупыл хартыс.

Ӓгит – аквапмат сыстам мӓнь яквет, хоты хӓталын поступтан яныг ян овтӗгыт. Апрасинья-сӓняныл тӓлыт миннӗныл ӗт нӗвлиңыг-тӗпыңыг ӗмтыс, тав ань пӓхвың посалыг сусхаты, хоты я вӓтанэ хаңхайн, лӓмн ос тыпн лӓп-яныгмавесыт.

Ты нӗ кӓсың нӓвраме сӓрни поталакве холыт сыме ӗлы-пӓлт тотыглас. Хунь нӓврам самын патты, тав нӗтнэ хорамың лӗптаг тӓрамлӓлы. Ань нӓмхотыют ат агтнув, манхурипаг атхуйплов тӓл ювле хультум порат Апрасинья ӓлыс. Кӓсың тӓл ӗт тав акваг тӓкмыс. Вӓраяң вӓрмале ласьлакв оссувластӗ, морсыңыс Евра ляпат вӓраяс. Мирон ӓйкатӗ ӗт тӗн тав ат ӓпсиянэ янмалтасанӗн ос вӓраян вӓрмалин ханисьтасанӗн. Тӗнти сӓт пыганӗн, аквап сӓт совыт – Яңгуй сӓт нӓпанэ, ос хӗрум ӓгиганӗн иң яныгмӗгыт, кӓсың тӓн ӗсыланыл тӗн уральтым ӓньсиянӗн.